

18

T 3223/1432181

建寧府志卷之三十三

哈佛大學漢和
圖書館珍藏印

人物

儒林

五代

孟貫字一之建安人以禮義文章節儉為當時師
範人稱孟夫子仕於周

宋

黃晞字景微年少時以有道稱閩中泉守陳靖福
守陳絳爭延請之躬率諸生試聽講席晞學無

不通尤游心春秋周易其說以左氏凡例得聖人之微鄭康成象數極天地之蘊學者校量攻擊莫能窮粵矣也嘗傲論語法言著書十篇發明聖賢道義之隱微與古今治理得失自題曰聾隅子欬歔瑣微論其解曰聾隅者枿物之名欬歔者兼歎之聲瑣微者迷之之謂也又著揚庭新論十篇指陳當世之務景祐中年四十矣始隨鄉貢至禮部又上五十策求應直言詔科俱以後時不得與試歎曰老大不隅豈能復從

諸少年場屋間乎然欲閱天下義理觀未見書當居京師遂僦舍僻處而士子競造其門一時公卿大夫交章論薦朝廷用丞相韓魏公言將以爲國子監直講晞自謝於富丞相曰某豈任仕宦者邪必不可辭願得七品閑官還南方足矣特詔授太學助教致仕嘉祐二年無疾卒於僦舍囊無餘貲惟蓄書數萬卷閩人蘇頌方仕於朝門人范遷張粵議請頌主其喪而韓魏公亦遣使爲幹殯且奠以文以爲晞之道德不用

於朝引爲已過已晞子挈襖載遺書返不能歸
豪殯于江都縣楊子寺後圃晞交遊故人因共
爲復土就葬其地其未葬也川陸之經繇者識
與不識皆過其下咨嗟留連或爲歌詩哀辭或
書名屋至於木膚竹籥題記殆遍其無位而得
民至誠而感物如此江都宰羅適爲作聲隅先
生祠堂而請蘇頌記之

練未字彥本建安人幹譽子累試禮部不利閉門
著書有大易發微二禮釋疑宋野遺民集

鄭轂字致遠建安人鎮之子也初就學晝夜誦中
庸不息父戲之曰此篇句讀易讀耶轂拱而對
曰讀書止於句讀安用之竊意聖人之道在此
書也旣冠入國學嘗執父喪火延喪室轂抱棺
叩頭慟哭不去已而火焚喪室柱至其半而止
鄉人名爲止火柱累舉未第歎曰昔之求道者
尚友於古人吾今未能及大賢之門其可已乎
遂走河南值二程已逝乃遊謝良佐之門而學
焉政和六年以八行舉尋第進士調御史臺主

簿秘書郎出守臨江軍馬祠歸自號九思

吳棫字才老建安人時號通儒著論語十說及考異語解諸書嘗患字學訛誤作補韻若干篇朱熹評近代考訂訓釋之學唯才老及洪慶善爲優遂據其說以協三百篇之音

邱富國字行可建安人嘗受學於朱熹門人淳祐中登第爲端陽僉判宋社旣屋遂不仕著周易輯解十卷經世補遺三卷易學記約五篇以發明朱氏宗旨

楊與立字子權學業朱文公之門知遂昌縣因家蘭谿學者宗之稱鉛山先生所輯有朱子語略二十卷

余允文字隱之建安人以孟軻亞聖而司馬光作疑孟數篇李昉鄭厚著常語及藝圃折衷皆肆詆毀乃作尊孟辨三十餘條闢之朱熹是其說又爲之訂定二

游倪從朱文公游所著有癸丑答問

鄭儀孫建安人號沅翠屏從邱富國學易咸淳癸酉

應賢良舉又明年少帝北行儀孫退而著書易圖說詳解大學中庸章句史學蒙求箋註性理字訓太守吳率幕屬迎於學師事之

吳秘字君謨甌寧人景祐初登進士甲科後爲侍御史兼知諫院以言事出知濠州提點京東刑獄御書刑政二字賜之秘好學著周易通神五卷注楊子牋太元叅政孫抃上其書召藏書府嘗歎春秋三傳同異欲作春秋集解以省府闕委因乞閑穉補同安守仍畀以轉運使祿秩省

府判官請罷理轉運資序自秘始

林志寧甌寧人嘗詣文潞公求教彥博云此無以相益有二程先生者可往從之因詣程氏求見遂與游酢楊時爲同門友

程元字善長甌寧人一名駘仲溫恭曠達自預舍選一時後生學士皆慕其行穉守張銖以經明行修薦不報時胡憲典教建寧元與邑人龔何叅學政後十年憲爲撫屬以事至建州二人皆已卒作詩悼之

葉湜字子是舉進士以父任調新化籍遭母喪服
 闋從江淮宣司辟以論軍事不合去尉贛之寧
 都改承仕郎丞惠安縣時守泉甚有真文忠公文
 忠嘗言僚佐之賢者數人而湜與昭武李方子
 公晦其最公晦學邃氣平本經術明世用子是
 堅彊介直遇事無難意處劇亡切容他人所不
 能為與所不敢者吾盡舉屬之二人勁易不同
 同歸於是文忠既得二人之助一人亦相得甚
 歡也湜仕終安仁令壯歲遊朱文公之門得直

養之說故其為人磊落明白無所回隱每自謂
 平生與賓客言者皆可語妻子

宋咸字貫之建陽人天聖二年進士累官知邵武
 軍立學置田以養士移守韶州去後誅悍卒境內
 肅然狄青經制廣西移咸為漕輔行職方員外郎
 奏乞於瓊管立學賜經史以變巖風官至都官
 郎中所著有易訓毛詩正紀外議或論語增註楊
 子法言註朝制要覽諸書五世孫以翔登第為湖

南帥參

江側字處中建陽人性純一以儒學教授其鄉熙
寧中以學究出身嘗與游定夫施景明葉祖洽
講肄於邑之石壁山官將作監主簿歷饒信洪
三邑今與族子汝舟號二先生

游醇字質夫復猶子醇夙以文行知名所交皆天
下士從弟酢得游程門與楊中立倡道閩南而
醇私淑家庭上下議論參考互訂文章理學一
時推重仕至奉議大夫

游復字執中建陽人篤實純明居鄉以經學教授
生徒凡受業其門者往往率德自好嘗一舉於
有司不第遂終身不求舉楊時誌其墓曰德足
以私淑諸人學足以垂世傳後而士之欲求師
友者莫宜於先生也不幸老死於窮簷陋室之
間而不大顯於時可哀也已

江杞字堅老建陽人政和二年進士歷仕州縣民
安其政爲御史致仕里居十有五年講學著書
不輟魏守魏矼見其所註孝經歎曰孟子有言
其君用之則安富尊榮其子弟從之則孝弟忠

信他日變此邦爲曾閔其必由此書也

江錡字全叔建陽人舉宣和辛丑進士文行推重於時所從遊多鉅人長者著有春秋經解三十卷辨疑一卷楊龜山見而稱之又著語孟說各五卷歷官宣教郎永州教授終徽猷閣學士邱義字道濟一字仁卿號子野建陽人隱居不仕穎敏嗜學該貫子史尤邃於易與朱熹友善所著有易說傳於世熹爲書芹溪小隱四字扁其堂又著復齋銘并芹溪九曲等詩以貽之

邱膺字子服義從弟從朱熹遊稱爲老友嘗與刊定周子通書及論老子管魄楊子載魄之義蔡元定謫春陵膺載俎遠郊涕泣不忍別羣儕皆感動熹得春陵信輒以告膺蓋歎道之孤不但平生交好之情而已

吳翊字晦叔建陽人師胡五峰五峯沒又與其弟廣仲子伯逢就張敬夫論學翌生平忠信撫幼孤曲有恩義與人交表裏殫竭心所不安者告語切至而不失其和故朋儕多受益而樂觀之

葉衡山稱其賢妻之以女翌因導其子定謁張敬夫受學定卒爲修士翌之力也敬夫門人在衡湘者日從翌參決所疑舊有嶽麓書院設山長教授生徒尋廢五峯嘗請復之乾道初帥守劉珙始復書院猶虛山長後轉運副使蕭之敏以禮聘翌翌曰侯之意美矣然此吾先師之所不得爲者豈可以涼德當之哉力辭不赴築室衡山下有竹林水沼之勝取程子澄濁求清意榜曰澄齋日與士友講道讀書翛然自樂及歿朱熹爲志狀

葉味道原名賀孫其先世蒼人後居建陽之後山少刻苦師事朱熹試禮部第一時僞學禁起味道對策率本程願知貢舉胡紘曰此必僞徒也黜之復從熹於武夷山禁解乃登第授鄂州教授遷宗學諭論對言人主之務學天下之福也必堅志氣以守所學謹幾微以驗所學正綱常以勵所學用忠言以克所學授太學博士兼崇政殿說書帝忽問鬼神之理疑伯有之事涉於

誕味道對曰陰陽二氣之散聚雖天地不能易
故聖人設爲宗祧以別親疎遠邇正所以教民
親愛參贊化育故伯有爲厲立子洩以奉其後
則神莫不寧矣蓋諷皇子竝事也三京用師廷
臣邊將交進機會之說味道進議狀以爲科配
日繁餽餉日迫民一不堪命龐勳黃巢之禍立
見是先搖其本無益於外也遷秘書著作佐郎
卒帝出內帑贖其喪所著四書說大學講義論
文脩子采字仲圭少從蔡淵學淳祐初登第授
邵武軍轉景獻府教授集近思錄集呈上悅遷
爲秘書監論郡守貪刻上納之遷樞密檢討累
官翰林侍講乞歸所著有集解近思錄西銘性
理等書行世

劉懋字子勉幽十一代孫也博學通經文辭奇偉
長受學於屏山先生得其論著經史大義數篇
繼從胡籍溪遊始知爲學大旨自是易象天文
地理律歷之奧無所不通而皆能訂其得失紹
興間以特奏名出身授迪功郎任會昌西尉兼

學事秩滿轉文林郎奉祠監衡州南嶽廟以朝
 奉大夫致仕杜門掃軌學以聖賢為師一時鄉
 人子弟多造就知名學者稱為恒軒先生子炯
 字季明煥之弟進士授進賢縣丞遷固始令早
 從朱熹學聞正心誠意之旨比挂冠歸武夷倘
 徉九曲之間悠然自尋其樂焉

蔡沈字復之元定次子更名知方從學朱熹嘗處
 困乏裕如也承父春秋之屬未得要領偶讀豁
 然曰易之一卦一爻義各異謂春秋以一例

該眾事可乎久之讀書至道心人心歎曰春秋
 二百四十餘年間諸侯大夫行事其發於道心
 者無幾故贈仲子納部鼎皆據大義以止私欲
 之流一書綱領大率在此矣復講明敬義大旨
 復卦大要作春秋五論而自為之序初沈遵父
 命嗣外戚虞英及晚年而母不欲為他人後也
 沈乃以子楠子欄歸蔡而子梓為虞氏後兩全
 父母之命學者稱為復齋先生

范念德字伯崇如圭子也從朱熹游深潛溫厚初

授廬陵簿以幹敏聞就辟吉州錄事參軍廉勤
惻惻一稔稱之累遷朝奉郎江東路帥司機宜
熹嘗得念德所著禱言讀之曰持守不差見理
漸明後熹疾革手書囑其修正禮書仕終宜黃
令

游九言字誠之建陽人初名九思湖南參議官嘗
之子慷慨善論十歲爲文詆秦檜從張栻游栻
教以求放心九言遂致力心學久之有得嘗序
太極圖曰周子以太極加無極何也方其寂然

無思萬善未發是無極也雖然未發而此心昭
然靈源不昧是太極也欲知太極先識吾心學
者多師之號默齋九言銳志當世務早承祖蔭
舉江西漕司進士第一歷古田尉江州錄事泐
海制司幹官入監文思院嘗被旨視諸邑災傷
歸白都堂放苗八分以上孝廟廢宮有司妄費
希賞九言上書極諫內侍切齒張栻帥廣西辟
幕下栻弟枸帥金陵復辟撫幹時學禁方嚴九
言記上元縣明道祠痛譏之調全椒令以不便

養親丐祠開禧初爲淮西安撫機宜文字尋知
光化軍克荆鄂宣撫叅謀官未行而卒端平間
特贈直龍圖閣諡文靖有語錄詩文傳於世
熊以寧少從朱文公遊舉進士授光澤簿剛直正
大一介不妄取予嘗曰學顏子之學志伊尹之
志分內事也有大學釋義中庸續說行世

劉炳字韜仲建陽人與兄煥從朱熹講學於寒泉
精舍時熹編集程氏遺書方成炳兄弟研窮誦
讀晨夜不怠熹嘗大書杜甫諸葛大名垂宇宙

一詩屬望之淳熙五年中進士乙科累官兵部
郎中朝請大夫丐祠閒居讀書不輟目號悠然
翁弟炳亦從熹學登進士爲固始令

熊節字端操十歲讀易日誦二卦卽知問難至通
曉而後止慶元中廷對條陳三德累官通直郎
致仕有中庸解二卷智仁堂彙十卷又有性理
羣書

劉厘字伯醇建陽人煥之子也自號靜齋累官承
務郎知江寧縣辟制置司幕官以收李全功進

秩朝請大夫歷知常州改南劍州以疾不赴與其徒熊竹谷輩講道終老

熊夢胄字竹谷少受業於蔡淵後遊真德秀劉屮之門潛心問學不求聞達所著有三禮通議春秋約說等編趙庸齋在史館時嘗以三朝通略上聞有旨下建郡抄錄且薦之入館同預史事力辭不就

熊剛大少穎敏從蔡淵黃幹遊問學精專操行篤至爲建安教授所著有詩經註解性理小學集

解學者稱爲古溪先生

游開字子蒙操季子也同上舍出身從朱熹游編集中庸熹和劉叔通詩有遠懷子蒙唐律之韻又答張孟遠書云友人游子蒙定夫先生從孫議論文學皆優贍可與晤語者計當自識之

蔡模字仲覺沉長子操行高潔風度夷坦隱居篤學嘗輯朱文公書爲續近思錄及易傳集解河洛探賸大學衍論語孟集疏等書淳祐中宰相謝方叔湯恢乞表異以勸後學有旨補迪功郎

添差本州教授令有司錄所著書并訪以所欲
言模疏言敬義爲萬世帝王心學大旨侷人大
師等六者爲國家守邦要道及請頒白鹿洞學
規於天下卒學者稱覺軒先生

劉應李字希泌初名榮建陽人炳之孫也咸淳甲
戌進士乙科授建陽主簿入元不仕退與熊禾
胡廷芳講明正道於洪源山居十有二年建化
龍書院於菖潭聚徒講授學者雲集

章才邵字希古崇安人元振子也少謁楊時時誨
以熟讀論語於論仁處子細玩味而躬行之才
邵用是有得故日用踐履莫非其所聞所知者
世目爲篤實君子

吳楫字公濟崇安人幼穎悟紹興末鄉試不第退
居田里閉戶讀書與朱熹李郁講明性理之學
及儒釋之辯甚悉熹扁其讀書所曰悅齋遣子
師之晚年以特恩補官調臨桂簿

歐陽光祖字慶嗣崇安人九歲能文時目爲童瑞
從劉子翬朱熹講學子翬貽書於熹曰自古擇

交最難道同志合未有若吾慶嗣者熹亦嘗遣
三子師事之登乾道八年進士趙汝愚張栻列
薦於朝方欲名用而汝愚去國光祖賦詩有曰
白髮駸駸吾老矣名場從此欲投簪熹和之云
江山風月依然在何日重來再盍簪後爲江西
轉運歸休松坡之上終焉

翁易字粹翁崇安人通六經尤長於春秋嘗預計
偕從劉焞遊因得登朱蔡之門講明義理往復
辨難悉究其旨晚授徒竹林精舍人稱竹林先

生

江默字德功崇安人灝之孫也乾道五年進士調
泉州安溪尉考垂滿父訃至卽解官歸後知建
寧縣卒于官民像而祠之默生平好學從朱熹
遊熹稱其他無嗜好一意詩書亦不多得嘗考
國朝典章凡三十六卷上之又有易訓解四書
訓詁又作象註疏

祝洙寶祐四年進士家庭講論精密嘗著四書集
註附錄宰執程元鳳蔡杭取其書進呈除迪功

郎興化軍徐直諒薦其學行於朝

徐幾字子與崇安人號進齋通諸經尤精於易理學之傳自朱真以後稱幾得其妙景定間以白衣薦崇政殿說書補迪功郎添差建寧府教授兼建安書院山長士多及門請質卒年七十五有經義行於世所著詩文僅存什一

章望之字表民浦城人以伯父得象蔭除秘書省校書郎監杭州茶庫踰年辭疾去上書論時政凡萬餘言不報兄拱之知晉江縣忤其守得罪

望之號訴於朝拱之竟得脫歐陽修韓絳吳奎

劉敞范鎮同薦其才除簽書建康軍節度判官

又除知烏程縣俱不赴遂以光祿寺丞致仕卒

望之喜議論宗孟軻言性善排斥荀卿楊雄韓

愈李翱之說著救性七篇歐陽修論魏梁爲正

統望之以爲非著明統三篇李觀謂仁義智信

樂政刑皆出於禮望之著禮論一篇以訂其說

又有歌詩雜文數百篇集爲三十卷

詳見宋史本傳

練繪字質夫浦城人少同楊時遊程頤之門甚器

之登大觀三年進士浮沉州縣不以軒冕爲榮
而以名教爲樂官至奉議郎

楊昭述字宗魯浦城人賦性醇雅而長於議論鄉
人多師之王簿陳襄待以殊禮嘉祐特奏名出
身授池州石埭尉始至進秀民教之邑人相率
趨學呼爲楊夫子任滿調雷州海康縣令卒

蕭顛字子莊浦城人天資樸實少孤事母以孝聞
母喪寢苦枕塊廬墓終喪有靈芝生几筵間晚
以累舉得官爲清流王簿終歲而歸徜徉自得

不以世故撓念與李郁陳淵羅從彥同受業楊
時之門朱松嘗師之答學者書云士之所志惟
仁必欲熟惟義必欲精仁熟則造次顛沛有所
不違義精則利用安身而德崇矣

潘殖字子醇浦城人自號浩然子進士累調真州
推官初好王氏之學後悟其非是迺以克己爲
學至忘寢食久之有得於是述忘筌書三卷理
性書九篇劉勉之胡憲劉子翬皆喜其書子翬
跋其後極稱其得學易門戶於易之復殖又嘗

畫觀象元契二圖大抵以背境回光爲主與忘筌書理性理並行於世

劉翔字圖南浦城人通諸經尤注意於易以累舉得官調斬春尉因上其所著易卦辭有旨看詳監學以通經旨聞授福州教授翔謂教官實風化所係要當上不負天子中不負州郡下不負子弟入學之意在官四年軒輊抑揚盡合公論再更潭州多士歸心以疾卒於官年六十九所著有經進易解十卷翰林洪邁爲之序

郭縝字天錫浦城人自幼讀書如素習弱冠鄉舉第二人晚得官調上杭簿留意邵雍象數之學兼取楊雄所擬列山氏易以章會統元推之久而成書計二萬八千言釐爲二十卷總之以圖名易春秋隆興紀元以其書上會得疾卒

練逢字彥默浦城人登進士第授撫州司戶任劍浦令改本州軍事推官部使者交薦之改秩而卒楊時銘其墓云孝尊於親學傳于人政得于民吁嗟乎君未聞而終于幕賓

謝綽中政和人時方崇尚王氏新經綽中間讀儀禮朱松見而異之卽與俱歸勉其所未至紹興登進士調秦寧簿自以不能俯仰領祠歸朱熹爲序其文集

元

張復字伯陽建安人爲建寧路知事從陳儀孫學易得邱氏之傳嘗輯諸儒議論編性理遺書十四卷

雷德潤字志澤一名

建安人父龍濟宋鄉貢

進士以狗國死於難德潤學邃於易旁通諸子及律歷術數之學舉明經歷除福州路教授樽節租入崇建殿宇修置禮器及買田立義莊以贍士調長樂主簿卒德潤爲學先德行而後文藝講論必以程朱爲主教人必以聖賢爲法以子機貴贈秘書少監

鄒文慧字季和在司訓元末謝職服柴桑巾服講明朱學本理學推文慧爲首

李文字士則聰敏篤學遊熊禾之門與杜本友善

談議間一以講學爲事聲聞四馳學者羣然取
正皇慶初舉爲蘇州學教授

明

楊應詔字天游建安人少開美有器度以孝廉通
籍泊如也絕意仕進以道學爲己任老而彌銳
識者謂得紫陽之正學隆慶間祀鄉賢所著有
道學淵源天游集困學錄諸書

熊熙字文明少從侯官林珙學易與晉江蔡清同
稱高弟授翁源訓導後謝病歸門人感泣道左
所著有四書周易管天

趙旻崇安人拔貢授蘭溪教諭以老解組提學院
鶚再詎講學三年分歸乃游廣中受業湛甘泉
門下二年送歸以詩云忘家忘病又忘身三月
天關不見人我欲移居仙掌上因風先報武夷
君嘉靖壬戌遭倭厲聲罵賊至鉗舌而不絕至
今人壯其氣節

謝肇黑湖至

武山掌土因履

建寧府志卷之三十四

人物

文苑

唐

葉京字垂孫建安人工詞賦咸通二年進士州人

登進士自京始廉訪使李景溫為號所居曰茂

才今南才里是也官至太常博士

五代

江文蔚字君章建陽人善詞賦後唐長興中擢進

士第後仕南唐累遷知制誥擢御史中丞坐廷
劾宰相馬延巳貶江州士曹叅軍奉其母以行
怡然不以貶謫爲意嘗作詩曰屈原若遇高堂
在終不懷沙吊汨灘久之召還爲翰林學士禮
部郎中保大十年卒諡曰簡有唐吳英秀賦七
十二卷桂香賦集三十卷子拯端拱中登第太
常少卿

江爲建陽人少遊廬山學詩於處士陳貺居白鹿
洞二十年與同邑人江文蔚楊徽之同時著名
累舉不第嘗題白鹿洞有云吟經蕭寺梅檀閣
醉倚王家玳瑁筵李景見之謂左右曰吟此詩
者大是貴族遂爲時所稱今靖安寺卽其故居
也楊徽之哭之有廢宅寒塘水荒墳宿草煙陳
覺民有却意當年江處士解言秋色露人家爲
詩有山形圍澤國秋色露人家故也有詩一卷

宋

張伯玉建安人進士舉書判拔萃科嘉祐中爲御
史嘗攻宰相文彥博不自安而去後出知太平

府時曾鞏爲司戶伯玉一日語之曰吾方作六經閣子爲我記之鞏數呈稿終不合意乃自爲之其首云六經閣者諸子百家皆在焉不書尊經也鞏歎服從此益勵於學伯玉後遷司封郎官有蓬萊詩二卷

徐常字彥和建安人元豐進士文學該貫與陳襄爲友別歷州縣奸民猾胥畏若神明與蘇軾兄弟遊從甚久又每慕二宋爲人嘗有詩云事業要須師二宋文章端是學三蘇軾亦嘗稱其爲

天下奇男子

楊蟠字公濟建安人進士爲密和二州推官以詩知名歐陽修贈詩有臥讀楊蟠一千首乞渠秋月與春風之句元祐中蘇軾知杭州蟠爲通判與軾唱酬居多後知溫壽二州卒有集二十卷

詳見宋史本傳

林光字子輝建安人性資極敏讀書過目輒不忘少有文名乾道初由鄉舉上禮部知舉梁克家喜其文以策語大訐寘第四名中進士丙科歷

韶州循州教授恬靜有守後以尚書韓元定薦
除刪定官後監左藏庫改秩知信豐縣部使者
尚其政績卒于承議郎嘗著建安志二十卷又
著兵論迂論數十卷

游次公字子明建安人自號西池范成大帥桂林
日次公實叅園幕有唱酬詩卷甚富尤長於詞
莊父字子嚴建安人號古洲居士博涉經史善
詩文尤長於詞其閨思鷓鴣天一闕云睡鴨徘徊
烟縷長日高春困不成粧步欹草色金蓮潤

撚斷花鬚玉笋香輕洛浦笑巫陽錦文親織寄
檀郎兒家閉戶春藏色戲蝶遊蜂不敢狂

陳以莊字敬叟建安人自號月溪詩句清新而詞
尤擅名一時玉林黃昇集中輿詞選多取其詞
翁孟寅字賓賜建安人善吟咏有夜泊一絕云夜
泊寒沙際江風起舊愁離情惟怕晚歸夢又逢
秋人多稱之

張諒字子京建安人與弟貢學易于邱富國著經
史事類書澤二十卷後賜秩翰林應奉文字貢

字壯夫

徐大正字得之甌寧人嘗赴省試過釣臺題詩云
光武初從血戰回故人長短尚論才中宵若起
唐虞興未必先生戀釣臺元祐中蘇軾見之遂
與定交嘗集室北山下名閒軒秦少游爲之記
軾爲賦詩人以北山學士呼之

吳激字彥高甌寧人工詩能文字畫俊逸將命至
金被畱比還命官翰苑後遷待制知深州有東
山集十餘卷

葉廷珪字嗣忠甌寧人少嗜書貧無可讀其曾祖
以差役至京傾橐而歸因得盡讀之政和五年
累除武邑丞時興燕山之役廷珪三部軍餉一
粒不食轉知德興縣張邦昌僞詔至不肯拜中
興後差知福清縣縣瀕海民困鬻鹽廷珪創增
鹽錢稍獲其便又有煮鹽利害圖及書州縣往
往遵用之名爲太守寺丞輪對乞搜訪遺書補
中秘府高宗嘗問方今禮樂之事廷珪以兵革
未息禮樂未遑爲對秦檜聞之不悅未幾出知

泉漳二州延珪性喜讀書歛業郡學升貢上庠
 登名桂籍入仕四十餘年未嘗一日去手每聞
 士大夫家有異書無不借讀讀無不終卷嘗恨
 無貲不能盡寫作數十大册擇其可用者手抄
 之名曰海錄文多者為海錄禱事細碎者為海
 錄碎事其未知故事所出者為海錄未見事其
 事物興造之原為海錄事始其詩人佳句曾經
 前輩稱道者為海錄警句圖其有事跡著見作
 詩之繇為海錄本事詩獨碎事文字最多初謂

之一四錄言其自一至四字有可取者皆錄之
 後改為碎事每讀文字見可錄者信手錄之既
 知泉州公餘無事因取類之為門七十五為卷
 二十有二事多新奇未經前人引用者復好為
 詩與吏部員外郎宋喬年以詩相善喬年議論
 少許可獨喜稱廷珪詩在泉中與傳自得一見
 如平生會即談詩一日誦其所作郡齊羅漢室
 示自得末句云幾多鴈鶩行間吏衙退頻來禮
 釋迦自得謂廷珪予每讀常蘇州詩今朝郡齊

間欲問楞迦字未嘗不廢卷太息想像蘇州之
風流蘊藉而知其當時之政泉故劇郡公使吏
輩優游如此此可觀公廷珪欣然以爲會心之
友

江任建陽人拯之子景德二年進士累官秘閣校
理知秦州卒有詩名楊億嘗摘其送人詩云盤
珠臨路泣斗印入鄉持以爲佳句云

阮逸字天隱建陽人爲鎮東軍節度推官景祐初
知杭州鄭向上其所撰樂論十二篇并律管十

三與胡瑗俱名赴闕命同校鐘律分造鐘磬各
一簾尋除鎮安軍掌記康定元年上鐘律制議
并圖三卷皇祐中更鑄太常鐘聲又名瑗逸與
近臣太常議秘閣遂典樂事遷尚書屯田員外
郎又有易筮及王制并田

劉子寰字圻父建陽人早登朱熹之門有詩名劉
克莊爲序其集同邑劉清夫字靜甫詩學與子
寰齊名而尤長于樂府云

劉清夫字靜甫建陽人世居麻沙詩學與劉子寰

齊名而尤長於樂府武夷詠梅一闕念奴嬌云
亂山清處見寒梅一朵皎然如雪的樂妍姿羞
半吐斜映小窓幽絕玉染香腮酥凝冷艷容態
天然別故人雖遠對花誰肯輕折疑是姑射神
仙幔亭宴罷迤邐停瑤節愛此溪山供秀潤飽
玩洞天風月萬石叢中百花頭上誰與爭高潔
龕桃俗李不須連夜催發人多傳之其他樂府
多入中興詞選

劉淮字叔通號溪翁建陽人博學能文甚有詩名
嘗題平遠臺云海天漠淡水雲寬開到梨花正
自寒却擁重裘上平遠愁心千疊倚欄干有詩
集若干卷

吳明老建陽人剛介有志操詩文雅饒意趣小園
解后錄多採輯之其詩云西風颯颯動長林斗
酒沾來伴月斟慷慨未應憂短褐悲歌原不爲
秋砧誰云塞馬年年健自是君門浩浩深世祖
神丰似高帝楚囚珎重莫沾襟有文集四十卷
劉鑑字子靜建陽人以祖澤蔭桂東令工詩文翰

墨如題文天祥贊答君虛齋僚諸詩深得風人之旨鄧尤薦稱其一生琢對匠語洗削治澤齒牙間纚纚有聲大率精切得意處前無古人至老皮毛落盡孤興兀然雷霹之琴大成之鑠潮湍激齧之山皆天然成趣不繩削而合

劉欽字子時建陽人幼在襁褓中或啼哭示以書帙卽嬉笑甫能言母梁教以古詩輒成誦不忘七歲日受數千言每夜達旦母憐而節之乃匿膏室中候寢熟復燃從蔡沉學精于易以祖蔭

補官承事郎知嵯縣有政聲轉朝奉大夫出知饒處邵武南康時江汀邵寇竊發境內騷動欽募義勇勦捕誅其首惡餘悉縱還鄉事聞陞殿中侍御史同知樞密諫院事歸隱武夷茶洞口築茶巖小隱堂爲終焉計自號冰壺散人終朝請大夫諡忠簡所著有書經衍義文集十卷

劉銓字子平建陽人博通詩禮其學一以考亭爲宗登開慶己未進士授臨川尉政治有聲尤工吟咏膾炙人口著有傷時歌深悼世人競於浮

靡不務本實穆然有返樸之思焉

翁邁字仲和崇安人幼聰敏博記能文年十三爲
罷舉首郡守元公暕以其幼不甚禮焉且扣之
曰小解元所讀何書邁答曰無書不讀日下所
講者詩之相鼠耳守雖知其譏已猶疑其未能
文也逮宴鹿鳴復命小妓就之覓詩卽戲題云
年未十三四嬌羞懶舉頭爾心還似我全未識
風流守大稱賞

詹庠字周文崇安人祥符初進士官至三門白波
輦運判景祐中進君臣龜鑑六十卷有詔褒諭
云汝策名雋科引籍華序夙究聖賢之學載馳
儒苑之名爰摭敏詞備存懿戒因燕居之一覽
實體要之可稱令其書行於世

彭彞字武山初名夷崇安人侍郎劉夔薦於朝謂
其士檢清修才章典贍旣而被名赴闕試于紫
薇閣誥詞褒美云朕惟衆科不足以盡天下之
士故因赦令而委天下以特招爾以守節見稱
而議論亦嘗試矣賜之一命使力行者有所勸

焉人因稱之為彭特招授將士郎試秘書省校書郎終大理寺丞有詩百餘篇李鞠為之序略曰公有高世過人之行其詩優柔平易無怨誹憤怒無聊不平之語信乎為治世之音

柳三變字耆卿一名永崇安人景祐間進士授員外郎工詞章擅名樂府仁宗誕辰太史奏老人星見永因為醉蓬萊詞以獻後有薦之者上曰此人任從風前月下淺斟低唱豈可令仕宦范鎮嘗見其所作歎曰仁宗四十年太平鎮在翰

苑十餘載不能出一語歌咏而乃於耆卿詞見之與兄三復三接皆工文藝號柳氏三絕

暨陶字粹翁崇安人長於聲律以飛龍位天德及聖人作而萬物覩賦知名登元豐五年進士初定陶為第一臚唱者乃以洎音呼其姓迄不應乃以次名遽陞唱第神宗顧考官蘇頌頌奏當以入聲呼之陶果出上曰卿何以知為入聲頌曰三國吳時有暨醯陶必其裔也及問陶鄉貫云建州上喜曰果吳人也官至承議郎子唐裔

登進士第官至中奉大夫

彭止字應期自號漫若崇安人詩筆甚高嘗謁辛棄疾值其晝寢題一絕于齋而去詞云碁子聲乾案接塵午牕時夢暖於春清風不動階前竹誰道今朝有故人棄疾覺遣人追之延畱屢月所爲詩皆清灑典雅有刻鵠集

江滋字益之一字德修崇安人家貧嗜學尤長於詩元祐三年進士知衡州來陽縣時舍法行滋始至視學字頽敝卽鼎新之作諭學詩七十韻

備述朝廷勉勵士子之意監司上其事特遷官繼知潁昌府長社縣時蘇轍退居潁上杜門謝賓客惟滋得其容接相與唱酬有潁川集官至朝議大夫

彭路字通古崇安人少明敏爲文清新嘗問神示路謨二字曰此公之名後路應舉治平三年以路名熙寧八年以謨名元豐四年七年俱以路謨名四舉獲優薦崇寧三年以特奏廷對爲第一聖語褒諭路進謝恩詩上命翰林學士和之

翁挺字士特崇安人少能賦及長該博羣書落筆
卽數千言政和中以季父彥國恩補官調宜章
尉朝臣交薦詔赴闕下所陳皆朝廷急務上喜
曰何見卿之晚改授少府監丞時相怒其不附
已逐之遂不復出號五峯居士有詩文集二十
卷李綱稱其文雄深雅健淵源浩博又稱其凌
厲奮發絕去筆墨畦徑

劉韞字仲固崇安人以蔭入仕歷倅三州典二郡
皆有政聲以朝散大夫致仕築室縣南有臺榭
花木之勝自號秀野與朱元晦諸賢唱酬甚多
子子翔善詩有父風

宋翔字子飛崇安人七歲賦燈詩曰耿耿照幽房
熒熒鶴燄長昔年江上女曾到乞餘光劉子翬
奇之紹興登進士歷官國子監簿時帝太后歸
慈寧宮祥瑞交至翔撰樂府十二首以獻其一
曰天意回皇母歸鳴和鸞敞宮闈朝陽赫奕明
鞠衣惟皇之孝惟母之慈奉和顏稱壽卮從之
家后與庶妃奏之九韶與咸池沓珍瑞駢福祺

山陬水澨共熙熙惟天之相與帝之宜千萬年
無窮期以朝散大夫致仕自號梅谷居士有梅
谷文集與同縣劉式翁石氏號三俊

劉如愚字明遠崇安人有才幹善屬文尤善吟咏
居鄉日與朱熹唱酬從子珙與同登第調海鹽
尉終江西帥司叅議官

詹慥字應之崇安人安貧守約一介不妄取喜誘
掖後進遠近從遊不下百餘人任贛州信豐尉
張浚辟爲屬走筆成文蔚有異采與吳宏劉子

翬暱有文集二十卷

劉珩字平父崇安人子翬之子仕爲從仕郎自號
七者翁與朱熹諸名賢唱和有詩集十卷

黃銖字子厚崇安人少師劉子翬與朱熹爲同門
友少熹一歲爲文略相上下熹每歎其不可及
其文喜學太史公詩喜屈宋曹劉而下及韋應
物尤善琴書隸法甚古得晉魏以前筆法其騷
詞能以古韻楚聲爲之卒熹爲序其集

劉褒字仲寵崇安人十歲能屬文舉進士除司門

郎中才高見忌不久朝列終朝請郎知泉州歸
老自號梅山老人有詩集

江史字夢良崇安人淳熙十四年進士初史家貧
好學嘗慕木待問之名不遠千里而取正焉逾
月告歸待問曰吾易東矣後就試南宮有賈寅
者太學名流也試罷徧謁同經叅問所試之文
私喜無出其右者及見史之文驚曰公第一矣
寅次焉泊揭榜果如寅言後歷袁泰吉三郡校

官

李仲光字景溫崇安人開禧元年進士趙汝騰一
見稱爲奇才以妹妻之才高見忌仕途多顛頓
自雷陽分教歸放情山水寓意花木精老莊韓
柳之文善記序有古體晚年詩愈高後爲湖廣
幕屬卒自號肯堂有肯堂集李襲之爲序

李誼字仲諧崇安人苦學通諸經尤精禮記與子
詰屢冠鄉薦開門授徒父子仕皆司理叅軍
哀長吉字叔巽崇安人舉進士調靜海軍掌書記
秩滿命駕而歸徜徉林泉託興吟咏結廬委順

因以委順翁自號雖老手不廢籍至道釋書亦
精究卒年八十九

趙必漣字仲連崇安人少刻苦讀書開慶間以父
澤當補官辭不受晚築室黃栢里自號山泉翁
植梅數百株名其居曰梅花莊與弟若樞日觴
咏其中有倚梅吟稿

劉濟字應徐崇安人有詩名嘗題趙必漣梅花莊
云莊後莊前千萬枝元方題遍季方詩何當把
酒依花樹坐對參橫月落時有日行辨明德辨

行世

劉學箕珙之子恬於仕進年未五十卽南山之下
居焉扁曰方是閑堂若將終身為文高爽閒雅
得其家傳劉淮稱其詩摩香山之壘詞拍稼軒
之肩至若松江峭遍直欲與坡仙爭衡人以為
知言有方是閒小稿行世

趙若樞字自木號霽山咸淳末登第入元不仕性
倜儻不治生產獨嗜吟咏徜徉山水間遇會心
處輒止數日人以陶阮輩日之評者謂其所作

得晚唐風致

范師孔字學可崇安人咸淳中預薦肄業武夷書院三司辟充講書橫經析理後進賴之尤工於詩賦有高樓高云高樓高登天美人美如玉美人坐高樓更彈天上曲飛聲落人間誰不注耳目安知妾此心長恐晝夜促莫羨高樓高莫羨美女美樓頭瞻明月樓下看流水月明圓易缺水流去不駛獨愛山中蘭幽香抱枝死有畫餅編行於世年七十五子棄字不遐亦善詩

鄭德普崇安人號景厓幼聰敏博記自塲屋文廢刻意學詩與趙若櫟范師孔日相酬唱其題靈巖云山蒸雲氣晴能雨泉挾風聲夏亦寒詠柳花云絕無氣力元非絮空費形容不是花題齊雲峯云石潤黏蒼蘚澗高流白雲詠南樓云鴈斷風仍急鳥啼天正陰皆佳句惜散逸不多見也

彭巖肖號歸峯崇安人嘗領鄉薦前輩咸以老成禮之嗜學至老不倦詩文窺韓杜戶庭每賦詩

不輕綴一字

楊徽之字仲猷浦城人家世尚武父澄獨折節爲儒終本邑令徽之少工詩賦與邑人江爲江文蔚齊名李氏據有江表間道詣汴洛以文投竇儀王樸深賞遇之周顯德中第進士爲拾遺力言太祖人望所歸不宜典禁兵太祖旣得天下將因事誅之晉王諫曰彼周室忠臣乃止開寶中除著作佐郎知金州太平與國初代還太宗因索所著詩徽之以數百篇奏御且獻詩爲謝

有十年流落今何幸叨遇君王問姓名之語太宗覽之稱賞尋轉庫部員外郎賜金紫判南曹同知京朝官差遣會詔編文苑英華以徽之精於風雅分命編詩爲百八十卷真宗卽位歷工部禮部侍郎樞密直學士兼秘書監咸平二年以衰疾求解近職改兵部兼職如故徽之入謝帝命勞之曰圖書之府清淨無事俾卿得以養性也是秋特置翰林侍讀學士命徽之與夏侯嶠呂文仲爲之徽之醇謹清素重名教尚風義

嘗言溫仲舒寇準以搏擊取貴位使後輩務習趨競禮俗浸薄時謂其知言卒年八十贈兵部尚書景祐二年再贈太子少師賜其家錢五十萬絹五百疋錄其近親三人徽之于俗寡偕惟李昉王祐深所推服及與石熙載李穆賈黃中爲文義友善談論多識典故尤好吟咏旣歿有集二十卷畱於家上令夏侯嶠取之以進詳見宋史本傳

楊億字大年浦城人祖文逸南塘玉山令億將生文逸夢道士稱懷玉山人來謁未幾億生有毛被體長尺餘經月乃落能言母以弄經口授隨卽成誦七歲能屬文對客談論有老成風雍熙初年十一召詣闕連試詩賦下筆立成太宗賞異令內侍送至中書又賦喜朝京闕詩卽授秘書省正字有願秉清忠節終身立聖朝之句從祖徽之嘗與語歎曰興吾門者在汝矣淳化中獻二京賦命試翰林賜進士第遷光祿寺丞直集賢院轉著作佐郎時公卿表疏多假文于億

真宗在京府徽之爲首僚郎中書疏悉億草定
卽位初超拜左正言預修太宗寶錄凡八十卷
億獨草五十六卷書成力丐外知處州召還爲
左司諫知制誥會修策府元龜其序次體制皆
億所定拜翰林學士又同修國史變例多出億
手歷官工部侍郎復爲翰林學士兼史館修撰
判館事億天性穎悟文格雄健才思敏捷略不
凝滯對客談笑揮翰不輟率精密有規裁當時
學者翕然宗之而博覽強記尤長于典章制度
時多取正然性耿介尚名節真宗立德妃爲后
欲得億草制億不奉詔卒年四七七贈禮部尚
書諡曰文有括蒼武夷穎陰韓城退居汝陽蓬
山寇鼇等集及內外制刀筆共一百九十四卷
詳見宋史本傳

黃元字清臣浦城人母夢星隕於懷掬吞之有娠
生元少奇穎過人年十五以文謁章得象得象
奇之遊錢塘以詩贈林逋逋尤激賞時王隨知
杭州奏禁西湖爲放生池元作詩數百言以頌

士人爭傳之元對人野率如不能言然嗜學強
記文詞奇偉其文二十卷號東溪集詳見宋史
本傳

黃鑑字唐卿浦城人舉進士補官爲國子監直講
同邑楊億喜其文詞延置門下由是知名累遷
太常博士爲國院編修官嘗詔館閣後苑賞花
鑑特預名國史成進直集賢院以母老出倅蘇
州修三朝寶訓未及上卒有談苑十五卷見宋
史

徐陟字公用浦城人博學強記日誦萬言年未冠
挾所爲文入京師見孫何何歎賞勉試制科上
其奏議五十卷召試會有家難不赴了謂當國
陟不肯見作詩寄意後擢祥符進士第以朝奉
郎判永州嘗作白馬謠數百言勵守邊者有君
恩山嶽重汝命鴻毛輕之句

楊翊字正臣浦城人善聲律有晉宋風度登天聖
中進士授南安尉偶得微疾檄去未幾疾愈
或勉之仕弗顧以詩酒自娛同年蔡襄招以詩

又率同列薦之不起

章岷字伯鎮浦城人天聖進士嘗與范仲淹同賦
鬪茶歌岷先就仲淹覽曰此詩真可壓倒元白
官至正議大夫光祿卿

練亨甫浦城人有文名爲王安石所知號爲小友
何去非字正通浦城人學問該博元豐中對策論
用兵之要曾鞏見而異之奏除武學教諭使校
兵法七書書奏復見褒賞尋擢博士蘇軾見其
文驚曰此今之班馬也力薦于朝詔加承奉郎

歷改廬州通判卒有集二十卷備論四卷司馬
法講義三卷三略講義三卷

姚易字夢錫浦城人博學能文與同邑葉常何去
非以詩賦馳名唱酬甚多元豐中第進士崇文
初有以文學薦易者名對除諸王館教授上出
所愛畫檜賜之歷官通判有畢集十卷傳於世
黃蕢字仲實浦城人震曾孫也童時父嘗與客飲

命蕢賦梔子詩滿座稱賞嘗作易傳推明大衍
之數尤精確元祐六年擢進士第調黃岡簿改

贛縣尉在官尚氣節不能俯仰改宣教郎知奉
新縣人以為賀黃曰為五斗折腰豈吾志哉未
赴而卒

吳駿字希遠浦城人元豐進士官饒州判有詩解
二十卷文集十卷雅健雄深衆體悉備

周固字適可浦城人元符三年進士調蕭山尉移
江東提舉司管勾文字有旨令兩制各舉所知
二人尚書曾孝廣以固應詔丞相何執中奏宜
處師儒之任除太學正遷博士京畿提學詔拜

監察御史擢太學司業累章乞外直秘閣知沂
州固為文必欲窺造道閫有補治道非區區模
倣者之所能及有璧水集十五卷

楊煥字元輝浦城人天資英邁弱冠為文有老成
氣崇寧中擢進士第調濠州鍾離主簿表進中
臺甘露頌陞從政郎授郴州司錄改宣教郎還
朝復表進所業二十卷天子奇其才擢知太寧
監歷官朝散大夫有文集三十卷宦遊集十卷
張豸字正仲浦城人幼警悟季父嘗戲之曰聞汝

讀孝經有何好處對曰立身揚名以顯父母季
父大奇之登大觀三年進士調建昌王簿改南
昌弋陽二邑丞靖康中翁彥國自錢塘舉師勤
王辟爲叅贊軍事聞彥國與趙子崧等會盟于
宿亳登壇爭軟豸以書苦諫曰淵聖駐危城中
宗社若綴旒日望四方勤王之師臣子當百舍
一息豈爭盟競長之時漢末曹袁故轍豈可復
蹈卽彥國弗能從後子崧等皆以罪罷紹興初
知潮之海陽縣曾孝蘊帥湖南辟知武岡軍命

未下卒豸工駢儷之文曾覲嘗薦於當路不獲
用有雙溪漫叟集二十卷松牕撫遺十二卷
葉常字權之浦城人舉進士授太學正遷博士常
與同里侍郎黃應圖交厚後以職事相失經年
因作燕燕詞以遺之應圖得詩甚喜相好如初
有文集五十卷

徐宗慶浦城人善議論通經史所著有皇王大訓
經世明道二書皇王大訓以載古今帝王之道
與爲治之具經世明道集則明聖賢之道之載

諸言者嘗辟教官以卒

陳律字宗禮政和人博學多通元豐八年登第嘗
畱詩縣西門外有三島路從天外去一枝香折
月中來之句因以折桂名亭

元

毛直方字靜可建安人宋咸淳中預薦入元授徒
講學士爭趨之有治靈稿四卷聊復軒稿二十
卷嘗編詩學大成及詩宗羣玉府三十卷行於
世後以教授半俸終其身

劉邊字近道建安人與熊禾友善工詩能文所著
有讀史撫言若干卷自家意思集十卷

虞韶字以成建安人博通今古善詩文嘗纂小學
日記切要故事十卷行於世

虞廷碩字君輔建安人工詩文尤邃舉子業嘗編
集歷代制誥五卷詔令四卷古賦準繩一卷行
于世

蘇照字明遠建安人工詩文尚儒術後進多師之
至正間以明經薦至京預纂脩事欲授以官以

親老辭臨川劉灼贈詩有才子曾聞起建安若
爲金馬得辭官之句尤精墨菊山水諸畫稱爲
名筆卒年八十子伯厚見選舉

虞光祖字善繼崇安人幼受學于熊禾博綜經史
爲文有跌宕氣官邵武教授

游應祥字子善崇安人酢七世孫天資淳厚博通
經史結屋澄川之上隱跡自晦後繇武夷直學
陞學正卒

楊載字仲宏浦城人徙杭州少孤博涉羣書爲文
有跌宕氣年四十不仕以賈國英薦召爲翰林
院國子編修官與修武宗實錄延祐初登進士
授官遷國路總管府推官卒初吳興趙孟頫在
翰林見載所爲文極推重之由是載之文名始
著凡所撰述人多傳誦其文一以氣爲主博而
敏直而不肆自成一言而於詩尤有體嘗語
學者曰詩當取裁于漢魏而音節則以唐爲宗
自其詩出一洗宋季之陋與虞集范德機揭傒
斯齊名世稱虞楊范揭有詩集行於世

陳楠老字良材政和人至元元年以鄉貢進士授興化路涵江書院山長轉建陽雲莊書院山長至正間棄官歸嘗過萬竹菴題詩曰青山迴望合萬竹淨娟娟寶殿晴光冷瑤階翠色妍龍吟明月夜鶴舞早秋天坐聽涼風發軒櫺響澗泉

楊恭叔名恭以字行建安人幼穎悟十歲作靈囿南薰賦大為時稱元季以詩經中澗江鄉試第一弟文叔以詩中第三時號聯璧俱不仕洪武

初以薦訓導建安有文集若干卷祀府學尊賢堂

張昌齡字有年建安人博學善吟嘗從杜本蔣易遊甚有詩名書法亦遒勁洪武間薦至京陛見之日太史奏卿雲見上大悅是日同舉者十有三人特旨俱除僉事不避籍貫任福建按察司未幾致仕卒所著有詩集一卷飯牛菴漫錄一卷

蘇仲簡名境以字行建安人照之子好學善文辭

與兄伯厚弟叔敬季雅自相講授洪武初以明
經薦授崇安縣儒學訓導以詩鳴所著有敬所
小藁四卷御史廬林陳仲述謂仲簡古詩如元
酒太羹土釧瓦缶質而不俚近體律絕如正人
端士褒衣危冠樸而不陋歌行古詞如山下出
泉鏘然有聲聽之無窮人以爲知言至京對貝
蘇伯厚名培以字行建安人文行見重洪武乙丑
以明經授建寧訓導後學多所造就永樂初預
太祖實錄遷翰林侍書復預修永樂大典兩典

春闈伯厚學本誠實議論皆有根據有素履集
子鑑以明經歷官稽勲郎中弟仲簡

楊壽夫名松以字行建安人通春秋孝友篤摯建
文辛巳郡守芮麟薦歷本學教諭多所造就典
鄉試者五會試者二宣德中楊文貞輩交薦之
陞翰林院編修預修宣廟實錄官至修撰

楊亘字恒叔建安人成化鄉薦除顯天判陞治中
轉太僕少卿正德中引疾歸闢園治於所居之
南摘靖節歸去來辭中語編名曰陶園吟咏其

中所著有紀行錄南都錄文獻內集陶園錄鳴
鶴餘音等集

滕霄字子冲建安人選翰林庶吉士轉修撰預修
國史進講經筵陞司經局洗馬清慎敦厚爲文
純正典雅一時翰學咸推重之

楊晉亨號燕山建安人廩生文敏公榮裔孫博極
羣書六經子史皆能發其奧旨古文詞直逼秦
漢詩有盛唐風督學宗方城公稱爲絕代奇才
有文集若干卷藏于家

趙友士字志道甌寧人宋宗室裔純厚樂易通易
詩書禮四經爲詩文雅贍和平洪武間以明經
舉爲府學訓導正己率下生徒樂從而尚書鄭
賜少師楊榮皆出其門官至國子助教有文集
一卷行世

田賦字用周甌寧人正德進士授刑科給事中奉
勅攢漕兩淮尋知池州府改繁調淮安所至有
善政工詩文著述有齊山志紀行錄管鳴集巡
漕集困衡集野樵雜言

謝純字梅岐甌寧人天性聰穎文畫兩絕尤諳兵法星占正德亞魁爲海州守做造木牛流馬一鞭可行數十步海州有龍圖之誦因巡方貪婪純以清介招尤遂棄官歸

謝元字朝之甌寧人以貢授蘇州府訓導轉教諭篤友義與邱湘交最善長于文詞

蘇汧字景濟甌寧人成化改元詔起經明行修于朝守以汧應薦預修憲廟秀廟實錄以疾辭歸書法備諸體寫染俱精妙所著有貽拙集燕遊

倡和錄

謝阜字少岡甌寧人十歲能詩爲涇縣令撰三都賦爲宗伯夏公以言有觸沮之作鋏人垂淚歌棄涇歸築鐵漢樓著歷代大事觀纂宗譜每屬詩文筆不加點無不妙絕時人稱富沙謝東坡謝丰字天湖甌寧人舉于鄉爲信宜縣令父子俱有才名父名暹貢士性樂山水著抱愚賦諸書丰亦好遊名山大川著六虛樓集數十卷談笑皆詩文凡一言之出率比之零金碎玉

趙秉忠字蓋臣甌寧人廣陵宗臣所取士嘉靖解
元萬楚甲戌會魁天資穎異淹貫羣書下筆千
言立就四六尤工人以擬駱丞所著有畏壘水
言等集

吳從周字世憲甌寧人事繼母孝產腴者讓弟提
學宗臣以孝友名家表其閭博學善文萬楚間
應貢廷試第一分訓海鹽與友生商確古今有
談苑錄行世致仕杜門屢薦鄉賓著石匏集史
辯書疑四卷

童經字述古號蘭畹甌寧人自幼穎悟通諸經子
史行誠篤非義之財一無所取知府賀沈高其
行欲薦之經力辭遂寢喜吟咏嘗樽節朱熹小
學每章協爲韻語使子姪誦之

謝桂芳字性卿甌寧人萬歷鄉薦工詩博洽有文
章名所著有泰宥編心經蠡測等集

范燧號鐵錫甌寧人萬歷癸卯舉人嗜酒善文人
有以文請者必置酒相招俟其醉乃爲之尤善
後爲來賓縣知縣

張智字元略建陽人元儒學提舉昇之子博學工
文詞有名于時洪武初以明經薦授湖廣夷陵
州學正教條嚴肅人材多所造就名陞禮部右
侍郎制度儀文嘗有建明未幾坐累左遷國子
學錄永樂乙酉陞國子司業卒于官所著文集
甚富

王相字舜舉建陽人七歲能詩以奇童薦洪武辛
亥應秀才舉歷官監察御史有蹇諤風以疾卒
於官年五十八相好吟咏所著有紀行錄秦淮

稿停雲稿懶菴稿窮愁稿省風稿若干卷

丁顯字彥偉建陽人博通經史援筆立成洪武十
八年會試第三人其第一爲黃子澄第二爲練
子寧及廷試顯居首子寧次之子澄又次之先
是上夢三絲墜地將臚唱以子澄年少議論過
激抑置第三而以二甲花綸易之三人姓名俱
有絲適與夢叶上喜甚俱賜狀元授翰林修撰
明開科狀元及第自顯始後坐事謫廣西馴象
衛時香山人周御史尚文秦郵人杜武椽伯恭

江西人羅時用易大年譚南宿俱一時名流與
顯同謫日相唱和超然自得久之死戍所太祖
曰顯年少自喜吾固裁之武將何得不護持令
其齋志耶悉論武將罪

蔣易字師文建陽人勵志篤學從杜本游徧交知
名士博極羣書篇磨句定手自刪錄學極精到
肆筆爲文汪洋滂沛直追古作左丞阮德柔分
省于建禮致幕府待以上賓之禮所著有鶴田
集二十卷編類元朝風雅三十卷行於世

盧欽字士明建陽人性好學五經百氏悉能貫解
曰讀書非徒記誦將以行之也洪武間以明經
聘爲僊州判卒

黃璿字景衡建陽人尚志節通經史百氏能言其
同異得失上下數千載繇監生任霸州判官致
仕潭故無志璿輯古今纂脩以傳晚號知非子
黃三陽字元泰建陽人隆慶間由貢歷官保定別
駕穎異該博初習毛詩後改戴氏禮最後習易
弱冠開講席至入仕從遊者以千數三經並授

友堂序元
陸
他如天文地理陰陽醫卜靡不究心晚而得官
官署蕭然公餘一編自適所著有禮易講議二
卷古豐政略二卷詩文二卷

李有則字子葵建陽人嘉靖鄉薦令順德縣多才
學刻燭千言立就所著有東陽聞紀壁文攷正
等書

江騰鯨字于潛建陽人署教卽墨轉銅陵府推官
萊州府通判爲人恬介不邀上官辭色官暇輒
稱詩灑墨曰不敢以區區俗吏荒廢吾心也其

論詩法曰詩寫性情天竅發而萬籟生有不得
而自知者一近色相詩而俳優一著煙火詩而
土木一苦思索詩而鴆毒一假剽竊詩而穿窬
藍智字明之崇安人洪武初以明經薦拜廣西按
察司僉事廉惠之聲甚著有藍澗集張昶嘗稱
其衆體兼備足追風雅兄靜之爲武夷山長尤
早馳詩譽有藍山集並傳於世

邱錫字永錫崇安人洪武己卯鄉薦歷官工科給
事自陳願爲學職預修永樂大典太宗實錄五

典文衡人服得士篤志嗜學著述甚富卒年八十

李韓字去華崇安人篤學履道有先正遺風高蹈鴻鵠恥爲祿仕惟以著述爲事著易導史遺行世晚年隱居更衣臺年近七十猶註東萊博議有和君復山居詩人以靖節擬之

蕭福字九疇浦城人學問該博舉進士選爲庶吉士與修永樂大典除兵部武庫司員外郎尋收吏部考功司以病歸卒于家所著有毅齊吟稿

黃福字汝錫浦城人博通經史由貢任杭州府學訓導陞太常博士永樂中與修五經四書大全及性理大全陞寺丞卒

徐驥字尚德浦城人性恬靜好爲詩文不以榮達介意由邑學弟子員陞太學援例授府經歷之職以歸題遊息之所曰安歸日以經史自娛家雖貧處之裕如也邑士夫多其學皆遣子弟從之遊所著有洪範解訂正及皇華詩一卷

吳中立字公度浦城人進士疏乞歸養父歿服闋

就選喟然曰古人爲親而祿今祿不逮親矣遂
絕意仕進以著述爲事結廬武夷太史張元扈
結駟入山諷以仕不出侍御楊四知冢宰楊巍
俱上其清修乞加榮寵欽拔禮部主事病痊錄
用萬曆壬辰推陞尚寶司丞報至已逝所著有
易銓古文學庸大旨道德經註圓覺經註河上
遺言奇鏡奇藏里抄諸書

葉固字廷堅松溪人唐建州刺史顥之後性樸素
自幼著學能詩文永樂中舉楷書赴京預修永
樂大典與祭酒胡儼爲文字交

楊茂字叔亨松溪人正德進士少有詩文名弱冠
舉於鄉擢進士告歸養復居湛盧六年學益進
起授評事轉陞江西僉憲未至任卒年三十二
所著有湛盧山人集

范茂先字華甫松溪人工古文詩歌有寄嘯集邑
人魏濬稱華甫詩自屈宋西京以下及元和長
慶靡所不窺不斤斤求似遑遑合之嘉靖間首
主禦倭之策卒全其城

陳木字可棟松溪人工古文詞與陳至言葉紀范
茂先魏濬同時稱五才子有集行世

葉紀字朝至松溪人遍遊都會與王百穀鄒南阜
曹能始輩相酬和有北遊草空谷集

國朝

楊士美字在中甌寧人貢生博洽通古今所學醇
正一以經史爲準令饒陽有善政著古言史論
諸書行世

建寧府志卷之三十四

終

